

# MEDECIN CHARITABLE & profitable au public.

Enseignant la maniere de faire, & preparer  
en la maison, avec facilité & peu de frais  
les remedes propres à toutes maladies, se-  
lon l'aduis du Medecin ordinaire.

*Avec un preseruatif assureé contre la Peste, composé &  
preparé par la Faculté de Medecine de Paris, assem-  
blée pour cet effect.*

A costé de chacun remede est cotté combien il peut couster.

Par PHILBERT GVIBERT Escuyer, Docteur Regent  
en ladite Faculté.



A P A R I S,  
Chez JEAN DE BORDEAUX, rue Daufine, au bout du  
Pont Neuf, pres les Augustins, à la Fleur de Lys  
Couronnée, 1623.





## AV LECTEUR.

**A** My Lecteur, ie vous ay describ  
familièrement en ce petit liuret,  
la maniere de faire & prepa-  
rer en vostre maisõ les remedes qui se pra-  
ctiquent iournellement par les bons & fi-  
dels Medecins pour toutes sortes de ma-  
ladies, lesquels pourrez faire facilement  
vous mesmes, ou si n'en voulez prendre  
la peine, les pourrez faire faire par vo-  
stre seruiteur ou seruante, comme se pra-  
ctique tous les iours en plusieurs bonnes  
maisons de ceste ville de Paris & ailleurs.  
Que si vous trouuez quelque difficulté  
en la confection d'iceux, vostre Medecin  
ordinaire vous en esclaircira, mesmes en  
moins de deux heures vous apprendra à  
faire tous lesdits remedes, & autres sem-

blables. Vous achèpterez les medicamens chez les espissiers & droguistes, estans choisis par ledit Medecin. Et les racines, herbes, semences, fleurs, &c. chez les herboristes, au poteau des Halles, à la place Maubert, ou autre lieu, le tout à fort bon marché, de sorte qu'en preparant lesdits remedes chez vous, cognoistrez la grande espargne de bourse que ferez, & leur operation tres-bonne & tres asseuree, comme plusieurs communitez de Religieux, Religieuses de bonnes & nobles familles, & aussi les pauvres gens le sçavent bien dire & tesmoigner au grand soulagement de leurs maladies, & grande espargne des frais excessifs qu'ils faisoient auparavant que leurs medecins ordinaires leur eussent enseigné la maniere de faire lesdits remedes chez eux, lesquels leur coustent peu de chose. Je ne descriray icy aucuns remedes que quelques medecins ordonnent aux malades, lesquels à dire vray sont inutiles, & toutes fois coustét bien cher.

comme sont certains iuleps, aposemes, electuaires, poudres, & autres bagatelles: veu que les ptisanes & bös boüillons faits en la maison, alterées & assaisonnez de bonnes herbes, racines, semences &c. sont meilleurs & plus naturels aux malades. Je vous aduertis de ne faire aucun remede sans premierement auoir pris l'aduis du Medecin, car encores qu'en ce petit liuret soient descrites exemples desdits remedes; toutesfois selon la maladie, causes, symptomes, le temperament du malade, la partie affectee, aage, force, & autres circonstances qui sont seulement cognuës au Medecin; faudra souuent changer & diuersifier les remedes; diminuer ou augmenter les doses des medicamens; & faire autres choses que ie serois long à raconter. Partant ne ferez rien sans en prendre son aduis, de peur de tomber en grand inconuenient, mesmes d'en mourir, comme il est aduenü & aduient trop souuent par l'ignorance & charlatanerie de certains cõ-

tréfaisans les Medecins. Suivez doncques seulement l'advis de vostre fidel Medecin, qui vous conseruera la vie, & espargnera vostre bien. En fin vous ne trouuerrez en ce petit liuret le stile si poly comme peut estre desireriez, mais scachez que ie l'ay mis de telle facon, afin qu'il peut estre facilement entendu de tous, vsant de termes vulgaires & populaires. Receuez doncques (amy Lecteur) ce petit liuret, tant pour la conseruation de vostre vie, & de celles de vostre famille, que pour vostre profit assure, comme vous verrez par experience à vostre grand contentement, m'asseurant que vous aurez pour agreable la peine que i'ay prise. A Dieu.

Vostre Medecin vous dira les vstensilles & medicamens que vous deuez auoir en vostre maison pour la necessite.

Notez que quand vous trouuerez escrit le poids d'un escu, i'entends la dragme de Medecine, qui est de soixante grains, & le poids de demy escu la demie dragme, qui est de trente grains.



TABLE DE CE  
QVI EST CONTENV  
EN CE PETIT LIVRE.

**L**'Epistre liminaire declarant le profit & vtilité du contenu en ce petit liuret. fol. 3.

Maniere de faire clysteres. pag. 9

Maniere de preparer suppositoires. page 13

Remede certain pour lascher le ventre de ceux qui sont constipez, & neantmoins ne veulēt vser de clysteres, ou suppositoires. page 14

Maniere de faire iniections. page. 15.

Maniere de faire pessaires. page. 16.

Maniere de faire ptisanne simple pour le boire ordinaire, page. 17.

Maniere de faire eau d'orge. page. 17.

Maniere de prendre le belart, & ce que couste le grain. page. 18.

Maniere de faire hydromel simple & composé. page. 18.

Maniere de faire ptisanes laxatiues. page. 19.

Maniere de faire eau de casse. page. 21.

Bouillon de sené purgatif. page. 22.

Maniere de faire & preparer medecines laxatiues de diuerses façons, & à peu de frais. page. 23.

Maniere de faire bol de casse. page. 27.

## T A B L E.

Maniere de faire vomitoires.	page 28.
Maniere de faire masticatoires.	page 29.
Maniere de faire gargarismes.	page 30.
Maniere de faire emulsions.	page 31.
Maniere de faire laiçt d'amandes.	page 32.
Maniere de faire orge mondé.	page 33.
Maniere de faire tablettes de sucre rosat.	pa. 33.
Maniere de faire frontal, ou bandeau rafraichissant, & pour reposer.	page 34.
Maniere de faire l'oxicrat.	page 35.
Maniere de faire l'Oxirrhodin.	page 35.
Maniere de faire l'Hydreleum.	page 36.
Maniere de faire Epithemes.	ibid.
Maniere de faire sternutatoires.	page 38.
Maniere de faire fumées ou parfums.	ibid.
Maniere de preparer fomentations & sachets.	page 39.
Maniere de faire cataplasme.	page 40.
Maniere de faire linimens.	page 41.
Vnguent excellent pour la bruflure, d'une bonne & charitable Damoiselle demeurant au Faux-bourgs S. Germain des Prez.	ibid.
Maniere de faire cerat rafraichissant.	43
Maniere de faire colyres.	page 43.
Maniere de faire vesicatoires.	44.
Des lauemens des pieds & iambes.	46.
Des bains.	ibid.





# MANIERE DE FAIRE

## CHLYSTERES.

*Clystere pour purger le ventre qui se peut  
faire en tout temps.*

**P**RENEZ vne chopinée d'orge, & vne poignée de son, faites les bouillir dans vne pinte d'eau de riuere, ou autre bonne eau, deux ou trois bouillons.

Prenez vne chopine de ceste decoction coulée, dans laquelle ferez boüillir vn bouillon vne demy once de bon Sené, & le pois de deux escus de graine d'anis verd, ou feuoüil verd, puis le coulerez par vn linge blanc ou estamine, l'exprimant mediocrement. Dedans ce qui sera passé delayerez miel, beurre, sucre rouge, comme s'ensuit.

Ayez vn plat, dans lequel mettez ensemble deux ou trois onces de bon miel, & vne once de sucre rouge, puis verserez par dessus sept ou huit cueilleres de ladite decoction chaude, de laquelle delayerez lesdits miel & sucre; & par apres y verserez le reste de ladite decoction, la delayant encores avec lesdits medicaments. Cela fait, repasserez le tout

Ce clystere, lequel est tres-bon, coustera six sols.

par l'estamine, ou linge blanc, & dedans ce qui sera coulé, desmelerez cinq ou six cueilleres, d'hui'e d'oliue, ou demy quarteron de beurre frais, & sera le clystere fait: lequel verferéz dans la Seringue pour le donner tiede, ou mediocrement chaud. Si vous n'avez en main que de lorge, vous ferés bouillir ladite poignée d'orge dans vne bonne chopine d'eau (comme dit est) & si n'avez que du son, vous feréz bouillir deux poignées de son dans vne pinte d'eau, obseruant ce que dessus.

Si par cas fortuit vous n'avez ny orge, ny son, vous pouuez prendre vne chopine du bouillon du pot ou de ptisane commune, ou laxatiue, ou de laiët clair, ou laiët commun, comme seraescrit cy apres.

Que si vous ne voulez vser de sedé audit clystere, vous le feréz ainsi.

Dans ladite chopine de decoction coulee, vous y delaierez ledit miel, succe rouge, ou huile, adioustant le pois d'vn escü de sel commun, ou d'auantage,

Notex.

Notez qu'en tous clysteres que vous feréz, quand vous aurez delayé ou dissoult ledit miel, ou autre medicament dans ladite decoction, faudra repasser le tout par ladite estamine ou linge, de peur que s'il y a quelque ordure parmi, elle ne se glisse dans le canon lors que l'on donneroit le clystere, & le bouchant empescheroit l'iniectiön d'iceluy.

*Autre clystere pour le mesme.*

**P**RENEZ son, oige commune, mulus, guimaulues, parietaire, violiers de Mars, porree, mercuriale, fleurs de camomille, & meliot, de chacun vne poignée; seméce de lin & frenugrec concassez, de chacune deux onces; hachez lesdites herbes & fleurs avec vn cousteau; apres les auoir nettoyees, & lauées

*Ce clystere coustera cinq sols.*

Puis prenez vn chaudron ou grand pot de terre, dans lequel mettez trois pintes d'eau plus ou moins, & ferez premierement bouillir l'orge vn bouillon ou deux, & apres ietterez le son, lesdites herbes, & fleurs, semences, faisant le tout bouillir iusques à ce que ladite decoction reuienne à trois chopines; Il y aura pour faire trois clysteres.

Prenez vne chopine d'icelle decoction coulee, & dans icelle chaude ferez infuser & tremper l'espace d'vne demie heure, ou vne heure le poids de trois escus, ou de demie once de bon sené, avec le poix de deux escus de graines d'anis verd, le faisant par apres vn tant soit peu bouillir, puis le passerez, & exprimerez comme dessus a esté dict, & dedans ce qui sera passé dissoudrez ce que le medecin ordonnera.

*Sub. 3  
c. 1. 1. 1.*

*Autre clystere.*

**P**RENEZ vne chopine de lait ou lait clair bouilly & passé; dedans delayerez deux onces de sucre rouge; voila le clystere fait. Vous pouuez aussi prendre chopine d'eau d'orge ou de prisanne, ou bouillon du pot; dedans delayerez ledit sucre rouge, ou vn

*Ce clystere de deux sols.*

quarteron de bon miel commun.

*Clystere rafraichissant.*

Ce clyst.  
est  
de  
sols.

**P**RENEZ vne pinte de lait clair, & le faites bouillir avec trois ou quatre laitues, & vne poignée de pourpier ou deux, prenez vne chopine de ceste decoction, & dans icelle delayez vn quarteron de miel, puis sera le clystere fait.

*Clystere de lait pour adoucir.*

Ce clyst.  
constera  
de  
sols.

**P**RENEZ chopine de bon lait frais, faites le bouillir vn bouillon. Dedans dissoudrés vn ou deux iaunes d'œuf fraiz, puis le passerez, & dedans ce qui sera passé delayez deux onces d'huile rosat, ou vne once & demie de bon beurre frais fondu.

*Clystere avec terebentine pour la colique nephritique.*

Ce clyst.  
constera  
de  
sols.

**P**RENEZ deux onces d'huile d'olive, ou de beurre frais, faites les chauffer sur le rechaud, ou cendres chaudes, puis tirez du feu, & versez dessus demie once de bonne terebentine de Venise, la delayant avec ledit beurre, ou huile (qui est chose fort facile) estant delayee, vous la dissoudrez avec vn des susdits clysteres selon l'aduis du Medecin.

Notex.

Notez que pour les petits enfans, ou petites personnes, il faudra diminuer la quantité de ladite decoction, & dose des medicaments.

Notex.

Notez aussi que sachant preparer lesdits clysteres cy dessus mentionnez, vous en pouvez preparer toutes sortes d'autres, comme clysteres altringens, carminatifs, nutritifs, & autres, lors que le medecin le iugera a propos.

## Maniere de preparer suppositoires.

**P**RENEZ deux onces de miel commun faites les cuire d'vn petit pœllon lentement sur le feu clair, iusques à ce qu'il acquiere consistance à peu prez d'vn electuaire solide. Cela fait tirez le hors du feu, y adioustant (pour le rendre plus acte) le pois d'vn escu de sel commun, meslez les tres bien ensemble avec vn escapule, & en formés suppositoires de la grosseur du doigt annulaire, & longueur de six à sept doigts pour les grandes personnes, & de trois ou quatre pour les petites, desquels vous voulant seruir, faudra graisser avec huile d'olive, ou beurre frais, & pour les conseruer les tenir dedans de la graisse, ou du beurre frais; car autrement ils se fondroyent, l'air les faisant fondre.

Aux petits enfans on fait des suppositoires avec saumon, ou avec vne coste de poëree, ou de l'herbe dicte mercuriale, ou vne petite chandelle de cire graissée avec beurre frais, ou sein doux.

Aussi au lieu de suppositoires, on peut mettre dans le siege trois ou quatre dragees de Verdū non musquées, ointes de beurre frais, l'vne apres l'autre ensemble.

Je n'ay voulu icy mettre plus d'exemple de suppositoires, parce qu'on se peut seruir au lieu d'iceux des susdits clysteres, ou des ptisanes laxatiues, ou de bouillon de fené que ie vay descrire.

Notex.

Notex.

Remede certain pour lascher le ventre de ceux qui sont constipez, & ne veulent user de clysteres, ou suppositoires.

**P**OUR ce qu'il y a des personnes si facheuses que pour tout l'or du monde ne voudroient recevoir clysteres, ou suppositoires, tant pour vne certaine honte qu'elles ont, que pour ce qu'elles sont affligées d'hemorroides internes, ou externes, ou autres maladies du siege; c'est pourquoy ils useront du remede suivant, lequel est excellent.

Prenez le pois d'un escu, ou d'un escu & demy, ou de deux escus de bon fené; le pois de demy escu de graine d'anis verd; Mettez les dans vne escuelle; & versez par dessus quatre ou cinq cuillerees d'eau, plus ou moins; que si la personne n'est point trauaillée de la toux, on pourra y mettre moitié eau, & moitié jus de citron. En après couurez ladite escuelle, & la mettez sur les cendres chaudes, ou autre lieu chaud l'espace d'une demie heure, ou vne heure pour infuser: puis passez le tout par l'estamine ou linge blanc en l'estreignant mediocrement, & ce qui sera passé le delayerez dās deux ou trois fois ou dauantage de bouillon maigre clair, ou dans vn premier bouillon de viande, le faisant prendre au matin à ieun vne heure soit d'ens auant manger.

Que si ledit bouillon est à quelques delicates des-agreable pour le goust du fené, alors vous exprimerez encores dans ledit bouillon le jus d'un limō. Que s'il refuse de rechef ledit bouil-

Chaque  
bouillon  
coustera  
ij. ou iij.  
sols.

lon préparé, de telle façon, en ce cas vous ne mettrez infuset ledit sené & anis sur les cendres chaudes, mais en vn autre lieu hors du feu, l'espace de trois heures, puis le passerez & dissoudrez dans le bouillon, y exprimant (comme à esté dit) vn ius de citron ou limon, & de ceste façon n'aura aucun mauuais goust.

Ledit bouillon de sené ainsi préparé deschargera le ventre, delayant & amolissant les excrémens endurcis, tellemēt que passans par le siege, ils n'aignt point les hemorroïdes, & ne feront aucune douleur qui est vn bon secret.

Que si a cause du long temps que le malade est constipé, ledit bouillon pris le matin ne descharge le ventre, (ce qui n'arriue gueres) faudra le reiterer au soir sur les quatre ou cinq heures, ou le iour d'apres au matin.

Aussi s'il refuse de prendre ledit bouillon de sené, on luy fera prendre au lieu d'iceluy vn bon verre de prisane laxatiue (laquelle ie descriray cy apres) au matin à ieun, comme dit est prenant vne heure ou deux apres vn bouillon maigre.

*Maniere de faire iniections.*

**L**Es iniections se font pour plusieurs maladies, comme aux vlcères & playes des parties du corps, aux maladies de la verge, & de la matrice, & ce avec seringues propres, dans lesquelles on met eaux, decoctions, huiles, ou autres liqueurs, selon l'aduis du medecin pour estre portees au mal.

Lesquelles iniections estans fort differentes

en composition pour remedier ausdictes maladies diuerfes, & s'accoumodant à la nature des parties, ne peuuent estre descriptes, mais selon l'occurrence le medecin present y pouruoir les faisant faire en la maison avec facilité.

*Maniere de faire pessaires,*

**L**E pessaire est plus gros que le suppositoire, & est approprié pour la matrice, lequel est fait de cotton, de soye, ou linge, ou laine peignée, dans lesquels on met medicamens, enueloppant le tout avec linge bien delié, ou tafetas, puis trempé dans eau, vin, suc, ou liqueur conuenable, & fourré dans le col de la matrice.

On en fait aussi avec herbes, fleurs, semences &c. pilez dans vn mortier, & enueloppez avec linge delié, qui a grande efficace.

*Notez*

Notez qu'il faut attacher vn petit ruban au bout dudit pessaire pour le lier à la cuisse, de peur qu'il soit attiré au dedans la matrice.

*Pessaire pour exciter les mots.*

*Ce pessaire  
se con-  
serue  
ra j. s. vj.  
des.*

**P**RENEZ les feuilles de deux ou trois poignées de l'herbe ditte mercuriale, escachez les dans le mortier avec vn pilon, puis les enuelopez dans vn linge delié, & ferez pessaire, lequel mouillerez dans vn suc tiede de ladite herbe, & en vsez.

*Pessaire pour arrester les mois.*

*Ce pessaire  
se con-  
serue  
j. s. vj.  
des.*

**P**RENEZ les feuilles des herbes suyuantes, à sçauoir de centinodia, (en françois renouée) myrthe, plantain, quinte feuille, bouillon blanc, de chacun demy poignée, pilez les ensemble



ensemble ( après les auoir nettoyyées ) dans le mortier, & en faites pessaire comme dict est ? que mouillerez dans du suc de plantain tiede.

*Maniere de faire ptisane simple pour le boire ordinaire.*

**P**RENEZ vne poignée d'orge commune préparée ( c'est à dire nettoyyée & lauée en belle eau, ) & le pois d'un escu de graine d'anis verd, faites les bouillir deux ou trois bouillôs dans deux pintes d'eau de riuere, ou autre bonne eau en vn coquemart de terre vernisfé, ou autre vaisseau bien net : puis encorés mettez bouillir vne demy once de bonne requelisse ( aussi preparée, c'est à dire ratissée & concassée ) qu'escumerez, & quand n'escumera plus, iera la ptisane faicte. Tirez du feu, & laissez refroidir, pour en vser au boire ordinaire.

*Cetepti-  
sane  
coustera  
vn sols,*

Il y à des personnes qui aiment grandement le goust de la requelisse, les autres qui l'aiment peu, alors vous diminuerez ou augmenterez la dose de ladite requelisse, ou à son lieu ou avec, mettez racine d'ozeille, de chiendan, raclore de corne de cerf, ou d'hyuoire, ou autres medicaments, selon l'aduis du medecin,

*Maniere de faire eau d'orge.*

**P**RENEZ vne poignée d'orge commune, préparée comme dit est, faites la bouillir dans vne pinte d'eau qui reuiène à trois demy septiers, la laissant par apres reposer & refroidir, pour la couler par vn linge blâc, & en vser.

Si c'est pour boire, vous la ferez bouillir avec vn peu de graine de fenouil verd,

ou vn peu de canelle.

*Maniere de prendre le bezaart, & ce que couste le grain dudit bezaart.*

**D**'Autant que nous parlons des ptisannes simples pour alterer les humeurs, nous pouuons aussi enseigner la maniere de prendre le bezaart, Prenez quatre, six, huit & dix grains ou d'auantage de bon bezaart mis en poudre, que mettez dans vne cuillier, versant par dessus vn petit de ptisanne ou ius de citron pour le delayer avec, & le prenez.

*Le grain du meilleur bezaart coustera vn sol.*

Je vous aduise que le grain du meilleur bezaart ne reuiet qu'à vn sol, & partant ie vous conseille d'en acheter chez les droguistes deux dragmes ou demy once, tant pour vostre famille que pour en faire aumosnes au pauures gens, veu qu'il couste si peu.

*Maniere de faire Hydromel simple.*

**P**renez deux pintes d'eau de riuere, ou autre bonne eau, quatre onces de bon miel, mettez le tout dans vn coquemard de terre vernissé. ou autre vaisseau propre, faictes le boüillir en l'escumant tousiours iusques à ce qu'il n'escume plus: retirez ledit coquemard du feu, & le laissez refroidir pour en vser à chaque prise vn demy septier.

*Chaque prise de cet hydromel 3. den.*

Il y en a qui mettent ceux onces de miel pour liure d'eau, mais il faut selon l'aduis du medecin, ou le goust du malade, augmenter ou diminuer la quantité du miel; car il y en a qui l'ayment beaucoup, les autres peu.

*Maniere de faire hydromel composé.*

**F**Aictes premierement bouillir les medicaments ordonnez ; puis estans bouillis selon l'intention du medecin, les passer & mettre cuire dedans la decoction autant de miel qu'il sera necessaire.

*Maniere de faire ptisannes laxatives.*

**P**renez vne once de bonne requelisse preparee, faictes la bouillir dans vne pinte d'eau, l'escumant bien, & quand ne iettera plus d'escume, tirez le coquemart du feu, & mettez y infuser toute la nuit demy once de fené, & le pois d'un escu de fenouil verd enclos bien au large dans vn linge blanc & delié. Le lendemain matin le coulerez, & en prendrez à chaque prise vn bon verre, & deux heures apres si vous voulez prendre vn bouillon maigre.

Chaque  
prise de  
cete pti-  
sanne 16  
den.

*Autre ptisanne laxative.*

**P**renez vne poignée d'orge commune preparee, racleure de corne de cerf & d'ivoire, de chacune vne pincée, enfermez lesdites racleures dans vn linge blanc & delié, mettez le tout dans vne pinte d'eau, en apres adioutez y vne once de bonne requelisse aussi preparee, comme a esté dict cy dessus, puis le nouiet de fené avec le fenouil verd faisant comme il a esté enseigné.

Chaque  
prise de  
cete pti-  
sanne

En esté prenez vne chopine d'eau de riuere, mettez la dans vne esguiere avec demy once de requelisse preparee, & le pois de deux escus de bon fené, & le pois de demy escu de graine

constera  
18. den.

de fenouil verd. Agitez le tout d'esguiere en autre plusieurs fois, puis laissez la reposer l'espace de deux au trois heures, puis en vsez comme dict est.

Cete prisanne se fera en esté avec eau de riuere, qui est comme cuite de la chaleur du soleil. Si on veut on peut laisser lesdits medicamens dans ledit coquemart ou esguiere sans les passer, & en yser iusques à ce que le tout soit beu.

Vous pouuez aussi enfermer dans ledit nouët de sené le pois d'un escu ou d'auantage de bonne rheubarbe decoupee en petits morceaux, avec vn peu de canelle, ou autant de bon agaric raspé, avec vn peu de zingembre, le tout tousiours avec le conseil du medecin.

*Autre prisanne laxatiue avec casse & sené.*

**P**Renez vne once de requelisse preparee, laquelle ferez bouillir avec vne pinte de bonne eau en l'escumant: Quand ne iettera plus d'escumie, vous y mettrez avec la mouelle & les pepins tirez d'un demy quarteron de casse en balton, que ferez bouillir vn bouillon, puis tirez le coquemart du feu, & y faictes infuser dedans toute la nuict en quelque lieu hors du feu le nouët de demy once de sené, avec le fenouil verd. Le lendemain matin on en vsera vn bon verre à chaque prise.

Notez comme a esté desia dict parlant du bouillon de sené, pour ceux qui ne veulent prendre suppositoires ou clysteres, si la personne estoit si constipee que ledit verre de pri-

Chaque  
prise con-  
stera 3. s.  
6. den.

Notez

fanne pris au matin ne purgeast le ventre (ce que toutesfois n'arriue gueres) faudra reprendre vn autre verre de ptisanne sur les quatre ou cinq heures au soir du iour mesme, ou le iour d'apres au matin.

Aussi selon l'aduis du medecin on peut prendre trois iours consecutifs au matin à ieun de cete ptisanne, ou de deux iours l'vn.

Le fidele medecin selon l'exigence des maladies, & des circonstances, à luy recongneüs, y augmentera, ou diminuera, ou changera les medicaments comme il verra bon estre.

Au surplus ie vous aduise que ces ptisannes laxatiues sont vne vraye manne, tant pour les riches que pour les paures; car ils ne coustent presque rien, (comme vous pouuez voir) & si sont de grand effect seruant de medecines purgatiues, & de clysteres, estant faciles à prendre, à cause de la quantité de requelisse qui abat le facheux goust des medicaments, & non leur force. Et partant vous deuez prier Dieu pour ceux qui les ont inuentées, & pour ceux qui les enseignent à faire en vos maisons, desquelles toutesfois vous ne deuez vser, sans au prealable auoir pris l'aduis de vostre medecin,

*Notex  
l'excellence  
de ces  
tisannes.*

*Maniere de faire eau de casse.*

**P**renez demy quarteron de bonne casse en baston, laquelle vous monderez, & mettez avec les pepins dans vn poesson, ou autre vaisseau, avec vne pinte de bonne eau, y mettant quant & quant le poids d'vn escu & demy

*Chaque  
prise cou-  
stera 4 s.*

de bõne canelle concassée, faites le tout bouillir vn bouillon, le passant par vn linge blanc, & delié, puis le laissés refroidir & en vsez, prenant d'icelle vn bon verre.

On peut aussi faire bouillir avec ladite casse vne once ou demie once de bons tamarinds, & aussi faire infuser le pois d'vn escu, ou de deux escus de bonne rheubarbe, mise en petits morceaux, le tout avec le conseil du medecin.

Notex.

On peut aussi facilement par cete methode faire les decoctiõs de gaiac, sarsepaille, chine & autres pour les maladies qui ne doivent estre diuulgées, en la curation desquelles pour l'honneur & santé du malade, il n'est besoin de tant de tesmoins, le medecin & le maistre Chirurgien y estant seulement necessaires, qui ayant le silence en la bouche. La difference seulement est pour la preparation desdits medicamens, & du temps qu'ils doivent infuser & bouillir, qui est peu de chose, de peu de peine, & facile à faire.

*Bouillon de sené purgatif.*

**P**renez demy once de sené, le poids d'vn escu de graines d'anis ou fenouil verd: faites les tremper toute la nuit avec la moitié d'vn demy septier d'eau au plus, & le ius d'vn limon, dans vne escuelle, & la mettez en quelque lieu loing du feu. Le matin venu vous le passerez par vn linge blanc, l'estreignant mediocrement, puis dissoudrez ce qui sera passé dans vn bouillon maigre, ou dans vn premier bouillon de viande, peu ou point salé. Et afin

Ce bouillon de sené couste va ius.

que ledit bouillon soit plus agreable, vous y exprimerez encore le ius d'un limon entier, que prendrez aussi tost, & a ieun, gardant la chambre.

Il y en a qui font tremper ledit sené & anis dans du verjus, mais il ne purge pas tant, parce que le verjus qui est astringent, empesche l'operation, & au contraire le ius de limon est laxatif.

*Notex*

*Maniere de faire & preparer medecines laxatiues de diuerses façons, & à peu de frans.*

**P**renez demie once de bon sené, le pois d'un escu de graine de fenouil verd, mettez les dans vne escuelle, verlez par dessus les deux tiers d'un demy septier de ptisane simple bien chaude, couurez ladite escuelle, & la mettez au coing du feu ou autre lieu peu chaut, afin de laisser tremper lesdits medicaments toute la nuit. Le matin faictes un petit bouillir ledit sené sur un rechaut, passez-le par un linge, l'exprimant mediocrement. Dedans ce qui sera passé, delayerez vne once de sirop de rose palles, & sera la medecine faicte, laquelle on prendra de bon matin à ieun, un petit froide, & trois heures apres un bouillon maigre & clair, & demie heure apres desheunera, gardant la chambre tout ce iour là.

*Autre Medecine laxatiue.*

**P**renez demie once de sené, le poids d'un escu de graine d'anis verd, faites les bouil-

*Ceste  
medic.  
ne couste  
ra ix s.*

lir dans vn demy septier d'eau de riuere, ou de ptisane ordinaire, passez-les par le linge, & dedans ce qui sera passé, dissoudrez vne once & demie de sirop de rose palle, & sera la medecine que prendrez comme dit est, & avec le mesme regime.

*Autre medecine laxatiue composée de sené, rheubarbe, agaric & sirop de roses palles*

**P**renez demie once de sené, & le poids d'un escu de graine d'anis verd, faites les bouillir vn bouillon dans vn demy septier de ptisane ordinaire ou d'eau d'orge, ou autre decoction appropriée selon l'aduis du medecin, passez, & exprimez les mediocrement. Dans ce qui sera passé, ferez ensemble tremper toute la nuit en vn lieu mediocrement chault le pois de deux escus de bon agaric raspé, ou coupé en petits morceaux, avec vn petit de zingembre, & le pois d'un escu & demy de bonne rheubarbe aussi mise en petits morceaux. Le matin venu faictes vn peu bouillir lesdits medicamens que passerez, & exprimerez mediocrement par l'estamine ou l'inge blanc, & dedans ce qui sera passé, dissoudrez vne once de sirop de roses palles, & sera la medecine que l'on prendra du grand matin à ieun, trois heures auant le bouillon maigre, gardant la chambre.

*Ceste  
medeci-  
ne couste  
va xv. s.*



Medecine laxative faite avec decoction de racines, herbes,  
 &c. Sené, Casse, Rhenbarbe, & Sirop de roses pastes.

**P**renez deux ou trois racines de chicoree sau-  
 uage, ratifiez les, & ostez la corde qui est de-  
 dans. Prenez aussi deux ou trois racines d'ozeille  
 que preparerez de mesme façon, cinq ou six ba-  
 stons de racine de chiendan, ratifiez & concassez,  
 le pois de trois escus de requelisse preparee.

Prenez aussi de l'agrimoine, betoine, scolopã-  
 dre, buglosse, bouroche, ozeille, pourpier, laictue,  
 de chacune demie poignee, vous y pouuez aussi  
 adiouster des semences & fleurs, espluchez, &  
 nettoyez bien les dites herbes, & fleurs, lauez le  
 tout dans belle eau, & les faites bouïllir à perfe-  
 ction dans vn pot de terre vernisse, ou autre vais-  
 seau propre avec suffisante quantité d'eau de ri-  
 uiere, ou autre bonne eau. Mettant premieremẽt  
 bouïllir les racines, puis les herbes, en fin les  
 fleurs & requelisse. En apres prenez suffisante  
 quantité de ladite decoction coulee pour faire la  
 medecine suiuaute.

Prenez demie once de bon sené, le poids de  
 deux escus de graine defenoil verd, ou anis verd:  
 mettez les dans vne escuelle; mettez aussi quant  
 & quant la mouelle & les pepins mondez d'vn  
 demy quarteron de casse en baston, & aussi le  
 pois d'vn escu, ou escu & demy de bonne rheu-  
 barbe taillee en petits morceaux. Cela fait versez  
 dessus lesdits medicamens autant de ladite deco-  
 ction bouïllante qu'il en sera de besoin pour les  
 faire tremper & infuser. Couurez ladite escuelle,  
 la mettant au coin de la cheminee, ou autre lieu

*Ceste me-  
 decine  
 constera  
 21. sols.*

moyennemēt chaud. Le l'endemain matin vous ferez vn peu bouïllir lefdits medicamens sur vn rechault, & les passerez par l'estamine, ou linge, les exprimant mediocrement. Et dedans ce qui sera passé, delayerez vne once de sirop de roses passes. Voila la medecine faite que prendrez aussi tost qu'elle sera refroidie, gardant le regime cy dessus ordonné.

*Maniere plus facile pour faire ladite medecine.*

**P**renez ledjt sené, & fenoil, faites les bouïllir dans suffisante quantité de ladite decoction, ou les faites infuser l'espace de trois ou quatre heures dans ladite decoction chaude en quelque lieu vn peu chaud, puis les coulerez, & exprimerez comme dit est, & dedans ce qui aura esté passé & exprimé, ferez infuser toute la nuit ladite casse & rheubarbe, puis les passerez, & exprimerez au matin: & dedans ce qui aura esté passé, dissoudrez ledit sirop de roses passes.

*Notez.*

On peut faire seruir le marc desdits medicamens pour vn clystere qui sera fort bon, faisant bouïllir ledit marc avec telle decoction de clystere que le medecin vous dira, puis le passerez & estreindeez; & dans ce qui sera passé delayerez miel, succe rouge, beure, ou autre chose propre.

*Notez.*

Ceste medecine cy dessus ordonnee vaut autant que s'il entroit du catholicon double, ou sirop de chicoree composé avec rheubarbe.

*Notez.*

Notez aussi que si n'avez la commodité d'auoir, ou d'aprester lefdites racines, herbes, semēces, & fleurs, pour faire la susdite medecine, vous prendrez de l'eau d'orge, ou de la prisane ordina;

re, ou autre decoction, comme le medecin le trouuera bon estre.

*Maniere de preparer bol de casse.*

**P**renez vn quarteron & demy de bonne casse de leuant en baston, mondez, & passez la sur la fumée de la decoction de graine d'anis verd: ce qui se fera de telle façon.

Prenez demie once de graine d'anis verd, faites la bouillir dans vn poësson va ou deux bouillons avec vn demy septier d'eau, apres versez le tout dans vne escuelle, mettant dessus le tas à mōder & passer la casse, sur lequel la mouëlle & pepins d'icelle seront passez, vous recueillerez avec vne cuillier ladite mouëlle de casse, & en ferez morceaux que prendrez en forme de pruneaux, sinapisez & couverts de sucre fin en poudre, ou enuelopez dans du pain à chanter, ou oublies mouillées dans de l'eau feule, ou eau vinée. Vn quart d'heure ou demie heure apres vous prendrez vn bouillon maigre, ou vn premier bouillon de chair peu salé, ou le bouillō de sené qui ensuit.

*Ce bol de casse coustera 20 sols.*

Le soir au parauant vous mettrez tremper toute la nuict le pois d'vn escu & demy, ou deux escus de bon sené avec le pois de demy escu de graine de fenail verd, dans deux ou trois cuilleres d'eau & autant de ius de citron.

*Ce boiillou coustera 18. deniers.*

Le lendemain matin vous passerez par vn linge, & exprimerez doucement ledit sené, & ce qui sera passé, vous le dissoudrez dans vn des bouillons susdits, Trois heure apres on desieunera, gardant la chambre ledit iour.

On peut mesler avec ladite mouëlle de casse le

pois d'un escu de bonne rheubarbe mise en pou dre, avec le conseil du medecin.

Notez que l'on monde la casse sur la fumée de graine d'anis, & au defaut d'iceluy de fenail verd, parce qu'estant flatueuse, elle engendre des trenchées & coliques, mesmes elle enuoye des vapeurs au cerueau, qui excitent quelquesfois mal de teste à ceux qui y sont subiects.

*Bol de casse pour purger & rafraichir les reins.*

*Ce bol  
de casse  
constera  
20. sols.*

**V**ous monderez & passerez vn quarteron & demy de bonne casse en baston (comme a esté dict) meslez avec ladite mouëlle de casse le pois d'un escu de poudre de requelisse, puis en ferez morceaux que prendrez l'un apres l'autre dans vne cuillier, & demie heure apres prendrez vn des bouillons susdits, dans lequel dissoudrez le ius d'un bon limon.

*Bol de casse avec terebenthine pour Gonorrhée.*

*Ledit b.  
constera  
20. sols.*

**P**renez la mouëlle d'un quarteron & demy de bonne casse en baston, avec icelle meslez avec le bout d'un costeau, ou espatule de bois, le pois d'un escu ou de deux escus de bonne terebenthine de Venise non lauee, & en ferez des morceaux que prendrez enuolopez dans des oublies, comme a esté dict. Demie heure apres prendrez vn bouillon maigre alteré avec herbes, racines aperitiues, & refrigeratiues, dans lequel on exprimera le ius d'un bon citron ou limon.

*Maniere de faire vomitoires.*

*Notez.*

**N**otez que le ptopre temps d'vser de vomitoires seurement, & à l'aise, est quand l'estomac est plein de viandes, c'est à dire apres a-

voir mangé; cela facilitant grandement la difficulté de vomissement, & purgeant mieux: les dites viandes amenant quant & soy les humeurs mauuaises qui sont au fons de l'estomac.

*Vomitoire commun.*

**P**renez douze cuillerees d'eau tiede, & trois ou quatre cuillerees d'huile d'olif, ou vne ou deux onces de beurre frais fondu, meslez les, & les beuez, mettât quelque temps apres le doigt en la bouche en cas que ledit vomitoire demeure trop long-temps à operer.

*Ce vomitoire coustera 18. den.*

*Autre vomitoire.*

**P**renez trois ou quatre raues ou refforts bien nettoyez, & concassez, demie once de semence de mauues aussi concassées, faictes les bouillir dans chopine d'eau, qui reuienne à vn demy septier coulé, dās lequel meslerez huile, ou beurre frais fondu, & en vsez.

*Ce vomitoire coustera 2. sols.*

*Vomitoire plus fort.*

**P**renez sept ou huit fueilles de cabaret vertes, pilez les dans vn mortier & tirez en le suc, lequel meslerez avec deux ou trois fois autant de vin blanc, ou eau d'orge, & le beuez tiede.

*Ce vomitoire coustera vn sols.*

*Autre vomitoire.*

**P**renez demy once de la racine dudit cabaret appellée azarum, netoyée & concassée, faictes la bouillir dans vne chopine d'eau d'orge qui reuienne à vn demy septier, puis y adioustez huile ou beurre frais, comme a esté dict, & faictes vomitoire.

*Ce vomitoire coustera 2. sols.*

*Maniere de faire Masticatoires.*

**L**e plus ordinaire, & plus facile de tous, est de prendre du mastic entier, maschez le, & à

*Ce Masticatoire coustera 6. den.* mesure que la pituite tombera du cerueau en la bouche, la faudra cracher : cela se doit faire au matin à iun.

*Autre masticatoire.*

*Ce masticatoire coustera 3. sols.* INCorporez ledit mastic avec de la cire fondue, & tant soit peu d'huile avec poiure, piretre, & staphisagre, puluerisez, & faites en pilules, prenant vne d'icelles la malchant, comme a esté dict, pour attirer plus amplement les humiditez du cerueau.

*Autre Masticatoire.*

*Ce masticatoire 3. sols.* Prenez poiure, & piretre, de chacun le pois d'un escu & demy, mettez les en poudre, & les incorporez avec bon miel, & en faictes morceaux de la grosseur d'une febue, lesquels ferrez seicher à l'ombre, & quand ils seront secs, en prenez, & vserez comme dessus.

*Maniere de faire Gargarismes.*

*Ce gargarisme coustera 1. sols.* Prenez prisane ordinaire cy dessus descrite, lauez en, & gargarisez la bouche, & la gorge tiedement, y meslant si vous voulez avec un demy septier, vne once de bon miel.

*Autre Gargarisme.*

*Ce gargarisme coustera 1. sols.* Prenez vne chopine d'eau d'orge, avec icelle meslez ce qu'il faudra de bon vinaigre, comme deux ou trois cuillerée pour le faire en forme d'oxicrat, & en vsiez.

*Autre Gargarisme.*

*Ce gargarisme coustera 3. sols.* Prenez vne poignée d'orge bien espluchée & lauée, agrimoine, plantain, roses de Prouins seiches ou nouvelles de chacune vne poignée, nettoyez aussi lesdites herbes & les lauez, puis fai-

tes bouillir avec vne peinte d'eau, ayant premierement mis l'orge seule bouillir deux ou trois bouillons avant les herbes, que la decoction reuienne à vne chopine coulée, dans laquelle delayerez cinq ou six cuillerées de bon miel, ou autant de sirop de meures & en vsez.

*Gargarisme adouciſſant la bouche & la gorge.*

**P**renez vingt cinq ou trente amandes douces pelées, pilez, & broyez les dans vn mortier de marbre, ou de bois, y versans petit à petit, en les broyant vn bon demy septier d'eau chaude, les laissant apres tremper sur les cendres chaudes dans vne escuelle l'espace d'vne demie heure, puis passez les par vn linge bien blanc, & delié, en exprimant mediocrement lesdites amandes, laissant par apres refroidir ce qui aura esté passé pour en vser. Vous y pourrez si vous voulez (pour rendre ledit gargarisme plus agreable) adiouster du sucre.

*Ce gargarisme  
constera  
2. sols.*

*Maniere de faire & preparer emulsions.*

*Emulsion pour rafraischir les reins, & pour l'ardeur d'vrine.*

**P**renez deux onces d'amandes douces pelées, puis les mettez dans vn mortier de marbre, lesquelles pilerez, & broyerez bien avec vn pilon de bois, y adioustât encores demie once de chacune des quatre grosses semences froides mondées, que pilerez, & broyerez aussi avec, en versant petit à petit du lait clair, ou ptisane, ou eau d'orge chaude, iusques à la quantité de trois demy septiers, puis passerez le tout par l'estamine, ou linge blanc & delié, & l'exprimetez. Dedans

Chaque  
prise con  
stera 5.  
sols.

ce qui aura esté passé, dissoudrez quatre once de  
succe fin, & deux oeces de ius de limons, & fera  
l'emulsion faicte, que prendrez en trois prises,  
trois heures apres manger, & deux heures auant.  
Que si l'ardeur d'vrine, & chaleur des reins e-  
stoyent si grandes, vous pilerez, & broyerez avec  
lesdites amandes & semences, demie once de se-  
mence de pauot blanc.

*Maniere de faire laiët d'amandes.*

Ce laiët  
d'amade  
coustera  
4. sols.

**P**renez deux onces d'amandes douces pelées,  
broyez les tres bien dans vn mortier de mar-  
bre avec pilon de bois, les arroufant peu à peu  
en les broyant avec eau bouillie iusques à vne  
chopine, puis passez le tout par vn linge blanc &  
delié, exprimez fort lesdites amades, puis mettez  
ce qui sera passé dans vn petit pot de terre ver-  
nissé, avec deux onces de succe fin, & deux ou  
trois grains de sel, si l'on veut, pour luy donner  
goust meilleur, le faisant puis apres bouillir à pe-  
tit feu clair, & sans fumée, le remuant tousiours  
avec vne cuilliet l'espace d'vne demie heure ou  
enuiro, que ledit laiët d'amande ne soit ny trop  
espais, ny trop clair; retirez le du feu, & le versez  
dans vne escuelle, le prenant à l'heure du dormir,  
qui sera sur les neuf à dix heures du soir.

Il y en a qui au lieu d'eau commune vsent d'eau  
d'orge ou ptisane; mais il semble qu'elles rendent  
le laiët d'amande roux, qui pourroit estre desa-  
greable à vne personne delicate.

Notex.

Il y en a aussi qui broyent, & pilent avec lesdi-  
tes amandes vne mie de pain blanc pour le ren-  
dre plus blac & nourrissant, ce que l'on peut faire.

Aussi



Aussi aux grandes chaleurs de reins, ou pour exciter le dormir, on pilera avec les susdites amandes le pois de trois escus ou davantage de semence de pauot blanc : mais que ce soit avec conseil. Notez.

*Maniere de faire orge mondé.*

**P**renez deux onces d'orge mondé, faites le bouillir avec trois chopines d'eau dans vn pot de terre vernissé à petit feu clair l'espace de trois ou quatre heures (car alors ledit orge sera creué) qu'il ne demeure qu'une bonne escuelée de decoction que coulerés par vn linge blanc sans exprimer ledit orge. En apres prenez dix ou douze amandes douces pelées, pilez les dans vn mortier de marbre, y versant petit à petit ladite decoction chaude, puis repassez par ledit linge les exprimant mediocrement, & ce qui sera exprimé le remettrez dans le pot de terre, avec vn bon morceau de sucre, le faisant bouillir vn bouillon, le donnant à prendre sur les neuf à dix heures du soir.

*Cet orge mondé  
coustera  
4. sols.*

Quelques vns expriment fort ledit orge cuit, les autres ne l'expriment point : comme a esté dict.

*Maniere de faire tablettes de sucre rosat.*

**P**renez demie liure de bon sucre bien blanc, & fin, quatre onces ou moins si faire se peut d'eau rose, mettez le tout dans vn poësson, & faites cuire à petit feu & clair en consistãce deüe, laquelle consistance vous cognoistrez alors qu'en enleuant vn peu avec l'espatule, il se fait vn filet delié, lequel retombant dans le poësson qu'aurez

tiré du feu, il demeure de mesme consistance sur la superficie de ladite cuisson, & si peu qu'il en restera tenant à l'espatule se congelera. Cela fait laissez le refroidir vn petit, puis iettez le sur le marbre ou table bien polie, sur laquelle vous aurez saupoudré vn peu de farine d'amidon par vn linge bien blanc, delié, & clair, & formerez lesdites tablettes.

*Maniere de faire frontal, ou bandeau rafraichissant,  
& pour reposer.*

**P**renez roses de Prouins seiches, ou nouvelles, ou celles des pains de roses distillées qui n'auront point esté bruslées, vne bonne poignée. Mettez la dans le mortier avec vne cuillerée ou deux d'oxicrat tiede: broyez le tout ensemble, que toute la mixtion soit humide, puis la mettez entre deux linges, & en faites frontal, que poserez tiede sur le frond & les temples à l'heure du dormir, ou en autre temps selon l'aduis du medecin, & s'il y a des laictues fraiches, ou pourpier, on en meslera vne demie poignée que broyerez avec lesdites roses.

*Autre bandeau pour le mesme.*

Ou prenez vn pain de roses, coupez en avec des ciseaux vn morceau du moins bruslé, à la largeur & longueur d'vn bandeau qui s'estende sur le front & les temples: Faites le tremper dans vn plat sur cendres chaudes, avec environ la moitié ou plus d'vn demy septier d'oxicrat: En apres mettez le entre deux linges blancs, & l'appliquez comme à esté dict.

*Ce frontal, ou bandeau coustera 1. sols, ou 18. den.*

*Ce bandeau coustera 1. s.*

*Autre bandeau pour le mesme.*

Ou frotez le frôt & les temples avec l'onguent appellé populeum, quelque espace de temps, puis mettez par dessus le bandeau cy dessus ordonné, ou linge en double trempé dans l'oxicrat tiede, lequel linge vous exprimerez deuant que de l'appliquer. La maniere de faire l'oxicrat sera descrite maintenant

*Ce bandeau con-  
stera 1. s.*

*Maniere de faire l'oxicrat.*

L'Oxicrat est composé de vinaigre & d'eau. Or parce que le vinaigre n'est pas tousiours de mesme force, car il y en a de bien fort, de foible, & de mediocre: C'est pourquoy il est difficile de prescrire iustemét la quantité du vinaigre à l'eau, ioinct aussi que les parties du corps, & les maladies sont quelquesfois dissemblables, sur lesquelles il faut vser dudit remede plus fort, ou plus foible: mais ordinairement on fait l'oxicrat de telle façon. Messant sur six parts d'eau vne partie de vinaigre commun; les autres messent autant de vinaigre avec l'eau qu'il se puisse boire, ne laissant aucune excessiue saueur acre à la bouche & à la gorge, ce qui me semble le meilleur.

*Maniere de faire l'Oxirrhodin.*

Prenez quatre cuillerees de bonne huile rosar, deux cuillerees d'eauë rose, & vne cuillerée de bon vinaigre, meslez le tout ensemble; voila l'oxirrhodin fait. Et quand vous en voudrez vser, mettez le chauffer dās vne escuelle, & en frottez tiede la partie, apposant par dessus vn linge sec ou trépé dans ledit oxirrhodin, ou oxicrat.

*Cet oxir-  
rhodin  
constera  
4. sols.*

**P**renez trois onces, cest à dire six cuillerées d'huile rosat, & vne demie once, c'est à dire vne cuillerée de bon vinaigre, meslez les ensemble pour en vser comme dessus.

*Maniere de faire Hydreleum.*

**L**edit Hydreleum se fait meslant avec six parties d'eau, vne d'huile.

### Maniere de faire Epithemes.

*Epitheme rafraichissant les parties intemperées de chaleur.*

*Cete opi  
thème  
coustera  
6. den.  
au plus.*

**P**RENEZ vne chopine d'oxicrat cy dessus escrit, mettez le chauffer sur vn rehaut mediocrement, puis trempez dedans des linges en double, & les ayant exprimez, les appliquerez tiedes sur les parties intemperées, y estandant par dessus vn autre linge sec en double, de peur de mouïller la chemise ou linceux, rechangeant lesdits linges, & en remettant d'autres trempez dans ledit oxicrat quand ils se commēceront à seicher ou refroidir.

*Notex.*

Cete maniere d'epitheme est de peu de frais; mais il est de grande efficace comme l'on voit tous les iours par experience, estant meilleur, & plus naturel que les epithemes faitts avec eaux distillées, ( lesquelles ont encore de la chaleur en soy ) & poudres qui sont de nulle efficace, & qui coustent bien cher.

*Epitheme pour mettre sur la region du cœur aux fleurs pourprées, malignes, & pestiferées.*

**P**renez de l'escorce de citron nouvelle, ou seiche, coupez la en petits morceaux, la faisant tremper vne ou deux heures dās vne chopine d'eau rose sur les cendres vn peu chaudes, puis passez par vn linge blanc, & dedans ce qui sera passé mestrez le ius d'vn citron ou limon, & sera l'epitheme fait, duquel la region du cœur sera fomentée tiedement trois fois le iour, avec linges doubles trempez en iceluy, les y renouellant souuent.

*Cet epitheme, avec theriaque coustera 16. sols.*

Si dedans ledit epitheme, vous y voulez delayer le pois d'vn escu, ou de deux escus de bonne theriaque, il sera tres excellent.

*Autre epitheme pour le mesme.*

Prenez deux poignées de l'herbe dicte la royne des prez, autant de scabieuse, autant de l'herbe morsus diaboli, semence de citrō, chardon benist, d'ozeille concassée, de chacune vne demie once. Nettoyez & lauez lesdictes herbes, & les mettez bouillir dans vne pinte de bonne eauë, y adioustant vn peu apres lesdites semences, qui reuiennent à vne bonne chopine coulee, dans laquelle refroidie dissoudrez le ius d'vn bon limon, & deux ou trois cuillerees de vinaigre rosat, & ledit theriaque; & sera l'epitheme fait, duquel vous vserez comme dessus.

*Cet epitheme coustera 10. sols.*

*Epitheme pour les intemperies froides du cœur.*

**P**renez bon vin odoriferant comme de celuy d'Orleans, ou de Bourgogne, ou autre bon vin, vn demy septier ou dauantage, faites le

Ces epi-  
theme  
constera  
2. sols.  
6. den.

chauffer, & estant chaud, trempez petits linges deliés en deux ou trois doubles, lesquels vous appliquerez sur la region du cœur, les rechangeant quand ils commenceront à refroidir.

On peut vser d'eau de vie au lieu du vin, mais avec l'aduis du Medecin.

*Maniere de faire sternutatoires.*

Ce ster-  
nutatoi-  
re con-  
stera 2.  
deniers.

**P**renez vn peu d'heleboire blanc ou euphorbe mis en poudre, soufflés en vn petit dans les narines avec vn petit tuyau de plume.

*Maniere de faire fumées ou parfums.*

*Parfum excellent pour donner bonne odeur en vne chambre & contre le mauvais air.*

Ce par-  
fum cou-  
stera 3. s.

**P**renez six cuillerées de bonne eauë rose, dix ou douze clouds de girofle concassés, & trois ou quatre petits morceaux d'escoice de citron ou d'orange mettez tout ensemble dans vne escuelle sur vn rehaut, dans lequel ait esté mis vn petit de feu, & le mettez au mitan de la chambre, ou autre lieu que desirerez parfumer, il s'eleuera vne vapeur fort agreable qui parfamera le lieu, & chassera le mauvais air.

*Autre parfum.*

Ce par-  
fum cou-  
stera 18.  
deniers.

Prenez sept ou huict cuillerées de vinaigre rosat, ou autre bon vinaigre, quatre ou cinq morceaux de pelure de citron, douze ou quinze cloux de girofle concassés: mettez le tout dans vn plat sur vn rehaut comme dessus.

Ce dernier parfum n'est pas si odoriferant que le premier, mais toutesfois il est fort bon.

Notex.

Notex qu'il ne faut faire bouillir lesdites com-

positions, ains seulement mettre sur autant de feu qu'il sera necessaire pour resoudre la liqueur doucement en vapeur.

On fait pareillement pour diuerses maladies, diuerses sortes de fumées & parfums: Sçauoir est de decoctions de racines, herbes, fleurs, semences &c. de gommés, sucs, & autres, lesquels quand ils seront necessaires, le medecin vous les enseignera à faire avec grande facilité, & peu de frais.

*Notez.*

### Maniere de preparer fomentations, & sachets.

#### *Fomentation pour la pleuresie.*

**P**RENEZ mauues, guimauues, parietaire, sauge, violiers de Mars, fleurs de camomille, melilot, de chacun vne poignée; nettoyez les dites herbes & fleurs, & les lauez, puis les hachez & faictes bouillir dans vn pot de terre ou chauderon avec suffisante quantité d'eau: sur la fin de la decoction vous y adiousterez vn demy septier de bon vin blanc subtil, en apres passez le tout, & l'exprimez, mettant ladite decoction coulée dans vn pot de terre, & dans icelle moyennemēt chaude tremperés vne espōge ou linge en double, duquel vous fomēterez la partie malade. Puis l'ayāt exprimée l'appliquerez chaude sur ladite partie la renouvelant quand commencera à se refroidir.

*Cete fomentatiō  
consterā  
six sols.*

#### *Sachets pour le mesme.*

Prenez lesdites herbes, & fleurs hachées, adioustant avec, si vous voulez, vne once de semence de lin, & autant de fenugrec conqasiez, & enfermez dans deux sachets de vieille toile blanche

Ces deux  
sachets  
cousteront  
7. sols.

& nette de la largeur & longueur que le medecin aduifera, lesquels contrepointerez avec fil, & les ferez bouillir dans du lait, ou de l'eau, puis ayant fomenté ladite partie avec ladite decoction, en appliquerez vn d'iceux chaut, & exprimé sur la partie dolente, le renouvelant de l'autre quand il commencera à refroidir.

*Sachet pour la douleur d'estomac.*

Ces deux  
sachets  
cousteront  
3. sols.

Prenez vne poignée d'absinte ou dauantage hachée en petits morceaux; autant de roses de Prouins, enfermez les dans deux petits sachets contrepointez, les faisant bouillir, ou dās de l'eau ou gros vin, ou oxirat, comme le medecin verra bon estre, & les appliquez chauds l'vn après l'autre.

Maniere de faire cataplasmes.

*Cataplasme pour les aposthemes & tumeurs.*

Ce cata-  
plasma  
qui est  
excellent  
coustera  
2. ou 3. s.

**P**RENEZ trois ou quatre poignées d'ozeil-  
le rōde, ou lōgue, ostez en toutes les queues,  
puis enuelopez la dans vne feuille de choux  
rouge, ou porrée, faictes la cuire sous les cendres  
chaudes, & estant cuite la tirerez, la mettant dans  
vne escuelle, ou mortier, la broyant avec pilon, y  
faisant puis apres fondre avec, vn morceau de  
beurre frais, ou sein doux, & voila le cataplasme  
faict. Et pour en vser.

Notex:

Prenez vne partie dudit cataplasme chault, l'estendrez sur du linge, & l'appliquerez sur la tumeur, soit charbon, aposteme pestilentiel, ou commun.

Notex:

Ledit cataplasme ramolist, suppure, resoult,  
bref



bref est de peu de coust, mais son operation en est  
excellente, on le rechangera deux fois le jour,  
c'est à scauoir au matin, & au soir.

Si aux charbons, bosses, & malignes tumeurs  
vous y voulez mesler de bonne theriaque, vous  
le rendrez extremement propre. *Notez.*

*Cataplasme remolitif.*

Prenez mauues, guimaues, avec leurs racines,  
absinte, parietaire, violiers de Mars, fleurs de ca-  
momille, & melilot de chacun vne poignée, vn  
oignon de lis, semence de lin, & fenugrec de cha-  
cune vne once, netoyez, & luez les herbes &  
racines, & concassez les semences, comme aussi  
l'oignon de lys. Mettez les bouillir dans deux pin-  
tes d'eau, plus ou moins, iusques à ce que le tout  
soit bien esbouilly: puis passerez la decoction par  
vn faz, lesdits ingrediens restans dessus, lesquels  
escacherez & passerez, comme l'on fait la casse  
pour en tirer la mouëlle, laquelle tirée ferez fon-  
dre avec icelle vn morceau de beurre frais, ou  
sein de pourceau, ou huile commun, & sera le  
cataplasme fait.

Que si desirez adiouster audit cataplasme des  
farines d'orge, ou de froment, ou autre, faudra  
prendre la quantité que vous voudrez, laquelle  
delayerez avec la decoction desdits medicamets,  
& ferez comme vne bouillie, que meslerez avec  
ladite mouëlle, y adioustant apres lesdites graisses  
ou huile.

*Cataplasme appellé le cataplasme pour les gangrenes, &  
charbons pestiferez.*

Prenez beurre frais, ou huile d'olif, vne once,

Ce cata-  
plasm.  
constra  
3. sols.

autant de bon miel, vn iaune d'œuf; & vn peu de farine de seigle, ou froment, faites premièrement fondre le beurre, ou chauffer l'huyle, puis y delayerez le iaune d'œuf, & miel, & en fin la farine, & sera le cataplasme, duquel v'serez avec conseil du Medecin.

*Maniere de faire linimens.*

Ce lini-  
mēt con-  
stera 2. s.

Prenez beurre frais vne once, canelle, ou noix muscade en poudre le pois d'vn escu; faites fondre le beurre dans vne escuelle, puis meslez ladite poudre, & sera le liniment fait.

*Autre liniment.*

Ou Prenez huile rosat deux onces, le pois d'vn escu de canelle & autant de clou de girofle mis en poudre, meslez les ensemble cōme a esté dict.

Notex.

Si desdits linimens vous en voulez faire vnguens, il faudra faire fondre avec ledit beurre ou huile vn petit morceau de cire.

*Vnguent excellent pour la brulure, d'vne bonne & charitable Damoselle demeurant aux faux-bourgs de saint Germain des Prez.*

Cet vnguent  
constra  
3. sols.

**P**renez pour vn sol de cire neuue mise en petits morceaux, pour vn sol d'huile d'olif, faites fondre la cire avec l'huile, puis tirez les hors du feu, & meslez avec, deux iaunes d'œufs durcis souz les cendres chaudes, & bien esmiez, battez le tout ensemble quel que temps, il viendra en vnguent.

Pour en vser prenez vn peu dudit vnguēt froid, estendez le sur du linge lequel n'en fera seulement que doré ( car il n'en faut que bien peu ) & l'appliquerez sur la partie brulée, & en peu de temps

la douleur sera appaisée, & en continuant, & re-  
changeant deux fois le iour, guerit sans laisser ci-  
catrice aucune.

Ladite damoiselle en a tousiours chez soy de  
prest, & en donne gratuitement à ceux qui luy en  
viennent demander.

*Maniere de faire cerat rafraichissant.*

Penez vne once de cire blanche, & quatre on-  
ces d'huyle d'olif, faiçtes fondre la cire decoupée  
en petits morceaux avec l'huyle, puis les laissez re-  
froïdir, en apres lavez les, & battez plusieurs fois  
comme douze ou quinze fois avec eau belle &  
claire, en rechangeât tousiours d'eau nouvelle au  
prix que vous iettez l'autre, iusques à ce que ledit  
unguent deuienne blanc comme neige: puis apres  
lavez-le encore trois ou quatre fois avec eau rose,  
pour luy donner bon odeur, & le mettez dans vn  
pot de terre, ou autre vaisseau conuenable, y met-  
tant avec de l'eau rose afin qu'il soit plus rafrai-  
chissant, & de plus agreable odeur.

Ce cerat  
coustera  
8. sols.

*Maniere de faire Colyre.*

*Colyre pour la gratelle pruriginense des paupieres.*

**P**RENEZ trois cuillerées de vin blanc, & au-  
tant d'eau, le pois d'vn escu d'aloës hepaticque  
mis en poudre, meslez le tout, & ferez colyre,  
dans lequel tiede tremperez linges deliez & doux,  
desquels vous estuerez le mal, y laissant par apres  
dessus ledit linge en double trempé.

Ce coly-  
re cou-  
stera 2.  
sols. 6. de

*Colyre pour la douleur des yeux.*

Prenez la grosseur d'vne petite febue de cou-  
perose que mettez en poudre dans deux ou trois

Cecolyre cuillerées d'eau claire, en vne petite sauciere: la-  
 constera- dite couperose estant fondue, vous vserez de la-  
 2. den. dite eau de telle façon.

au plus. Prenez de ceste eau avec le bout du doigt, &  
 en mettez dedans le grand canthus de l'œil deux  
 ou trois gouttes deux ou trois fois le iour, cligno-  
 tant alors vn peu l'œil pour faire que ladite eau  
 s'espande par tout l'œil.

*Colyre refrigeratif, & corroboratif au commencement  
 d'une fluxion.*

Prenez eau de plantain, & eau rose, de chacune  
 trois ou quatre cuillerées, le blanc d'un œuf fraiz,  
 mettez & agitez les ensemble dans vn plat, &  
 fera le colyte fait, dans lequel tiede tremperez  
 linges deliez en double ou simple, que polerez  
 tant sur l'œil malade, que sur le front & à l'entour  
 de mesme coste.

Vous pouuez aussi vser de ladite eau de plan-  
 tain seule, ou de ladite eau rose aussi seule, ou des  
 deux meslées ensemble tiedes faisant comme  
 dessus.

*Maniere de faire vesicatoires.*

Prenez mouches cantharides le pois d'un escu,  
 ou demy escu, mettez les en poudre d'as vn mor-  
 tier, puis meslez ladite poudre avec suffisante  
 quantité de l'onguent appellé Basilicon qu'il re-  
 uienne à consistance de cerat pour en vser.

Prenez vn peu de ladite confection, & l'esten-  
 dez sur vn peu de toile, ou morceau de taffetas; &  
 en faictes emplastres que poserez sur la partie  
 selon l'aduis du medecin.

*Autre vesicatoire.*

Prenez le pois d'un escu desdites mouches en poudre, incorporez les avec le pois de trois ou quatre escus de bon leuain en vn mortier, y adioustant vne demie cuillerée de bon vinaigre, & en vsez comme a esté dict.

*Chaque emplastre, conserua vn denier.*

*Autre vesicatoire.*

Prenez le pois d'un escu de bonne moustarde, le pois aussi d'un escu de cantharides, mettez le tout en poudre, laquelle meslerez dans vn mortier avec demie once de bõ leuain, & vne cuillerée de bon vinaigre, & en vsez comme dessus.

*A vn d. l'empl.*

## Des lauemens des pieds &amp; iambes.

*Maniere de faire lauement des pieds & iambes pour exciter le dormir.*

**P**renez huit ou dix laictues ou dauantage, ou cinq ou six poignees de feuilles de vigne, ou cinq ou six testes de panot, faictes les bouillir dans vn moyen chaudron avec suffisante quantité d'eau, puis ayant bouilly deux ou trois bouillons, versez le tout dans vne grande terrine, & on lauera les pieds & iambes de ceste decoctiõ tiede l'espace d'un bon quard'heure ou demie heure, commençant le lauement avec lesdits ingrediens du haut des iambes en bas. Apres on envelopera lesdites iambes & pieds avec vn linge vn peu chault sans les essuyer, remettant le malade dan le lit pour reposer, laissant lesdites parties enveloppées comme dict est.

*Ce lauement. conserua 3. ou 4. sols.*

**C**Hacun ſçait maintenant comme on prepare les bains d'eau tiede, & les demy bains : partant ien'en parleray point. Seulement diray-ie que pour la guerison d'aucunes maladies, les medecins ordonnent quelquesfois faire bouillir racines, herbes, ſemences, fleurs, & autres choſes mettant leſdits ingrediens dans vn grand chauderon plein d'eau, & quand ils ſeront bouillis, on verſe & la decoction, & leſdits medicamens dans ledit bain prepare.

Touchant les bains ſecs, ou eſtues ſeiches pour exciter les ſueurs. Il y a pluſieurs perſonnes en ceſte ville de Paris qui les preparent en leur maiſon avec grande commodite. Partant ceux qui auront beſoin, apres auoir conſulté le medecin, les iront trouver.

~~PRESERVATIF ASSEV-~~  
 PRESERVATIF ASSEV-  
 ré contre la peste.



**K**E vous donne le plus esgal preserva-  
 tif au milieu des extremittez, des  
 quatre qualitez que faire se peut,  
 à fin qu'il proffite à tous & ne nuise  
 à aucun. Qui est celuy qui est  
 composé & préparé à nos escoles de medecine  
 ceste annee pour la contagion presente, par le  
 iugement de toute la faculté assemblee à cet effet.  
 Il ne couste que dix sols l'once, & n'en doit on  
 prendre que le poids d'un escu pour les grandes  
 personnes, & le poids de demy escu pour les pe-  
 tits, quarante grains pour les mediocres. On le  
 prend au matin à ieun, vne heure avant manger,  
 ou dans vne cuiller beuvant par dessus vn plein  
 verre d'oxicrat, ou d'eau avec quatre cuillerées  
 de vin, ou dissout avec ledit vin trempé, ou oxi-  
 crat.

Quand vous aurez crainte d'avoir receu quel-  
 que mauvaïse haleine pestilente, vous aurez alors  
 recours à vingt ou trente grains de bonne theria-  
 que dissous dans ledit oxicrat, ou vin trempé;

*Ce pre-  
 servatif  
 se vend  
 aux es-  
 colles de  
 medeci-  
 ne. Sa  
 composition  
 est de  
 deux  
 grains  
 la redite  
 payant  
 58.*

*Le grain  
 de theria-  
 que  
 constera  
 un den.*